

مصر تقصف السودان!

"إحنا سكتنا كثير على مصر..

وفضلنا ساكتين لفترة كبيرة على مشاركة الطيران المصري في الحرب
ضدنا..

كنا نتمنى إن صمتنا يخلي النظام المصري يتراجع عن المشاركة في
الحرب

ولكنه سكوتنا خلاه يتمادى أكثر!"

الجملتين اللي فاتوا دول.. ملخص جزء من تصريحات قالها
قائد قوات الدعم السريع في السودان الفريق **محمد حمدان دقلو**.. الشهير
بحميدتي

اتكلم فيها عن مصر وقال إنها متورطة في الحرب السودانية

اللي بقالها أكثر من سنة ونص شغالة..

تعالوا نشوف إيه اللي حصل واتقال.

رغم إن حميدتي ظهر واطكلم في فيديو مدته نص ساعة
إلا إن في تقريبا 120 ثانية من النص ساعة دي هي اللي كان عليها كل
التركيز

وركزت عليها كتير من وسائل الإعلام حول العالم..

..

في الـ 120 ثانية دي تقريبا اتهم حميدتي النظام المصري بشكل مباشر..
بتورطها في المعارك اللي دايرة في السودان ما بين قوات الدعم السريع..

وبين قوات الجيش السوداني.. وقال حميدتي في الفيديو

إن القاهرة قدمت دعم ودربت قوات الجيش السوداني

ووفرت ليهم السلاح.. خاصة الطائرات المسيرة القتالية.

وبحسب حميدتي فالموضوع أكبر من مجرد دعم

حميدتي اتهم الجيش المصري بالمشاركة في العمليات العسكرية

وذكر واحدة من المشاركات دي.. اللي نفذها الطيران الحربي المصري



في منطقة جبل موية بولاية سنار وسط السودان..

وقال إن الطيران المصري قصف قواته باستخدام قنابل أمريكية على
الأراضي السودانية

وقال حميدتي إنه سكت كثير على تورط الجيش المصري في الحرب
السودانية.

في الناحية الثانية..

ومع التصريحات اللي بالصوت والصورة..

واللي عملت قلق وقلبان..

خرجت وزارة الخارجية المصرية ببيان نفت فيه بشكل كامل تصريحات
حميدتي..

قالوا إنها مزاعم.. يعني تأليف.. محصلتش..

وأكدوا إن الاتهامات دي جاية في الوقت اللي مصر بتحاول فيه بكل طاقتها
إنها توقف الحرب في السودان..

يعني إحنا مش بنشارك فيها.. لأ.. مصر بتحاول بالطرق الدبلوماسية توقف
الحرب.

ده قصد البيان اللي مذكرهوش بوضوح

وقالت الخارجية إن مصر بتساعد على قد ما تقدر في خطط الأعمال الإغاثية والإنسانية.

يعني كده عندنا حميدتي بيتهم النظام المصري بالمشاركة في الحرب والخارجية المصرية بتتفي.

تعالوا بقى ناخذ خطوة لورا.. ونرجع قبل تصريحات حميدتي بساعات أو أيام قليلة..

هنلاقي إن في فيديوهات وتصريحات انتشرت لقادة في الجيش السوداني..

بيتهموا فيها الإمارات إنها متورطة بدعم حميدتي بالأسلحة

وعرضوا فيها صناديق أسلحة وذخائر

مكتوب عليها إنها تابعة لأبو ظبي في الإمارات العربية المتحدة.

فهل الإمارات قررت ترد على اتهامات الجيش السوداني

أو بحسب البعض الفضيحة بكشف تورطهم في حرب السودان..

بأنه عن طريق حميدتي.. يطلع يكشف هو كمان تورط مصر في الحرب..

مش بس بالتسليح.. ده كمان بالقتال؟ يمكن!

هو غريب بس ممكن..

غريب لإن كلنا عارفين إن السيسي وبن زايد علاقتهم قوية جداً ببعض..

وفي نفس الوقت كلنا عارفين إن بن زايد بيدعم حميدتي بالمال والسلاح

فإزاي السيسي هيضرب في حميدتي!؟

في حين إن بن سلمان علاقته كويسة بعبد الفتاح البرهان.. قائد الجيش
السوداني وخصم حميدتي.

فإيه اللي بيحصل في السودان..

وقد إيه مصر والسعودية والإمارات متورطين!

ده اللي ممكن تكشف عنه الأيام الجاية.